

# Meningkatkan kesejahteraan rakyat

## **Gambaran keseluruhan**

### **Sorotan Rancangan Malaysia Kesepuluh, 2011-2015: Pencapaian**

### **Mengimbas pencapaian Rancangan Malaysia Kesepuluh, 2011-2015: Kemajuan**

Menambah baik akses kepada perkhidmatan penjagaan kesihatan berkualiti

Memastikan akses kepada perumahan mampu milik dan berkualiti

Menjadikan jalaran lebih selamat dan masyarakat lebih tenteram

Meningkatkan kesepaduan sosial dan perpaduan nasional

Memupuk budaya sukan dan membangunkan bakat untuk meningkatkan kesejahteraan

### **Ringkasan bidang fokus Rancangan Malaysia Kesebelas, 2016-2020**

#### **Hala tuju Rancangan Malaysia Kesebelas, 2016-2020**

Bidang fokus A: Mencapai akses secepat kepada penjagaan kesihatan berkualiti

Bidang fokus B: Menyediakan perumahan mampu milik yang mencukupi dan berkualiti kepada isi rumah miskin, berpendapatan rendah dan sederhana

Bidang fokus C: Mewujudkan persekitaran hidup lebih selamat untuk masyarakat yang berdaya maju dan sejahtera

Bidang fokus D: Meningkatkan keselamatan jalan raya dan perkhidmatan kecemasan untuk mengurangkan fataliti

Bidang fokus E: Membudayakan semangat 1Malaysia untuk memperkukuh kesepaduan sosial dan perpaduan nasional

Bidang fokus F: Menggiatkan sukan untuk kehidupan yang sihat dan memupuk perpaduan

#### **Kesimpulan**



## Gambaran keseluruhan

Kerajaan sentiasa mengambil pendekatan pembangunan seimbang yang memberikan penekanan kepada pertumbuhan ekonomi dan kesejahteraan rakyat. Walaupun tiada definisi khusus bagi kesejahteraan, istilah ini secara umumnya dikaitkan dengan taraf dan kualiti hidup yang merangkumi aspek ekonomi, sosial, fizikal dan psikologi yang memberikan manfaat kepada masyarakat. Di Malaysia, aspek ini dimanifestasikan dalam penjagaan kesihatan yang berkualiti; perumahan mampu milik; peningkatan keselamatan dan ketenteraman awam; penambahbaikan perkhidmatan kecemasan; pengukuhan integrasi sosial dan perpaduan; serta penyertaan yang meluas dalam sukan. Kesejahteraan yang lebih baik juga akan meningkatkan produktiviti dan kemajuan rakyat.

**Dalam tempoh Rancangan Malaysia Kesepuluh (RMKe-10), 2011-2015,** Kerajaan telah membuat pelaburan yang besar untuk meningkatkan kesejahteraan rakyat. Penambahbaikan dalam sektor penjagaan kesihatan telah meningkatkan akses kepada perkhidmatan penjagaan kesihatan, meningkatkan jangka hayat, dan mengurangkan kadar kematian bayi dan ibu. Program perumahan telah meningkatkan kemampuan isi rumah berpendapatan rendah dan sederhana untuk memiliki rumah. Di samping itu, garis panduan yang berkaitan juga diwujudkan untuk menyediakan persekitaran kehidupan yang lebih kondusif. Kadar jenayah telah berkurang melebihi 20% dengan pelaksanaan langkah-langkah seperti *omnipresence* di kawasan sering berlaku jenayah dan penyertaan masyarakat yang lebih meluas dalam aktiviti kawalan kawasan kejiranan secara sukarela. Program interaksi sosial melibatkan agensi kerajaan, badan bukan kerajaan (NGO) dan masyarakat telah meningkat dengan ketara, mewujudkan perkongsian pengalaman dan nilai yang memupuk kesepaduan sosial serta memperkukuh perpaduan

nasional. Penglibatan rakyat Malaysia dalam aktiviti sukan telah meningkat daripada 32% pada tahun 2011 kepada 40.8% pada tahun 2014. Peningkatan ini mencerminkan semakin ramai rakyat menghargai faedah sosioekonomi daripada sukan, iaitu bukan sahaja menyokong amalan gaya hidup sihat, malah memperkukuh perpaduan nasional.

**Dalam tempoh Rancangan Malaysia Kesebelas (RMKe-11), 2016-2020,** aspek kesejahteraan kekal sebagai teras utama dalam merealisasikan Wawasan 2020. Penambahbaikan dalam penjagaan kesihatan akan ditumpukan kepada menangani keperluan penduduk yang kurang mendapat perkhidmatan, menambah baik sistem penyampaian kesihatan untuk meningkatkan kecekapan dan keberkesanan, dan mempergiat kerjasama dengan sektor swasta dan NGO. Program perumahan akan terus dilaksanakan untuk isi rumah miskin, berpendapatan rendah dan sederhana, termasuk belia dan pasangan muda yang berkahwin. Usaha pencegahan jenayah akan memberikan tumpuan kepada peningkatan kerjasama dalam kalangan pihak berkepentingan daripada sektor awam dan swasta, meningkatkan keupayaan anggota penguat kuasa undang-undang, dan memperkemas peraturan serta memperkukuh penguatkuasaan. Selain itu, satu inisiatif baharu dalam meningkatkan keselamatan jalan raya dan perkhidmatan kecemasan akan diperkenalkan. Platform untuk interaksi antara dan dalam kalangan kumpulan sosial yang berbeza akan diperkukuh bagi memupuk kesepaduan sosial dan perpaduan nasional. Di samping itu, lebih banyak program untuk memupuk etika dan nilai moral akan dilaksanakan di sekolah dan institusi pengajian tinggi (IPT). Penekanan akan diberikan kepada penyertaan dalam sukan massa dan pembangunan atlet berprestasi tinggi serta membangunkan keupayaan kepimpinan belia dalam sukan dan aktiviti berkaitan sukan.

# Sorotan

## Rancangan Malaysia Kesepuluh, 2011-2015: Pencapaian

**25.4**  
mata

Peningkatan kesejahteraan keseluruhan berasaskan Indeks Kesejahteraan Rakyat Malaysia antara tahun 2000 dan 2012

**Penambahbaikkan keseluruhan dalam Indeks Kesejahteraan Rakyat Malaysia**

**74.8**  
tahun

Anggaran peningkatan jangka hayat pada tahun 2014 berbanding 74.1 tahun pada tahun 2010

**Menambah baik akses kepada perkhidmatan penjagaan kesihatan berkualiti**

**6.5**  
kematian bayi

Anggaran pengurangan kadar kematian bayi bagi setiap 1,000 kelahiran hidup pada tahun 2014 berbanding 6.7 pada tahun 2010

**58,530**

Peningkatan jumlah katil hospital<sup>1</sup> pada tahun 2014 daripada 55,180 pada tahun 2010

**102,200**

Jumlah rumah mampu milik telah siap dibina untuk isi rumah miskin, berpendapatan rendah dan sederhana

**Memastikan akses kepada perumahan mampu milik dan berkualiti**

<sup>1</sup> Katil di hospital awam dan swasta, pusat jagaan perbidanan dan kejururawatan, hospis dan pusat rawatan harian

22.7%

Pengurangan indeks jenayah sebanyak 22.7% dalam tempoh 2011-2014

17.6%

Pengurangan jenayah jalanan sebanyak 17.6% dalam tempoh 2011-2014

53.2%

Peningkatan 53.2% Skim Rondaan Sukarela (SRS) yang berdaftar dalam tempoh 2011-2014

MKPN

Penubuhan Majlis Konsultasi Perpaduan Negara (MKPN) pada tahun 2013

36

Atlet Malaysia berada pada kedudukan 10 terbaik dunia pada tahun 2014

**Menjadikan jalanan lebih selamat dan masyarakat lebih tenteram**

**Meningkatkan kesepaduan sosial dan perpaduan nasional**

**Memupuk budaya sukan dan membangunkan bakat untuk meningkatkan kesejahteraan**

# Mengimbaskan pencapaian Rancangan Malaysia Kesepuluh, 2011 -2015: Kemajuan

Rancangan Malaysia Kesepuluh akan meningkatkan kesejahteraan rakyat melalui tumpuan berterusan terhadap perkhidmatan penjagaan kesihatan, keselamatan awam, penyediaan perumahan mampu milik, kesepaduan sosial, dan pembangunan sukan.

Dalam tempoh RMKe-10, kesejahteraan rakyat telah dipertingkatkan melalui tumpuan berterusan terhadap perkhidmatan penjagaan kesihatan, keselamatan awam, penyediaan perumahan mampu milik, integrasi sosial, dan pembangunan sukan. Hasil daripada inisiatif tersebut, kesejahteraan rakyat bertambah baik, seperti yang dilaporkan dalam Laporan Kesejahteraan Rakyat Malaysia 2013. Indeks Kesejahteraan Rakyat Malaysia (IKRM) keseluruhan meningkat 25.4 mata antara tahun 2000 dan 2012, seperti yang ditunjukkan dalam Paparan 4-1. Subkomposit kesejahteraan ekonomi meningkat 33.3 mata manakala subkomposit kesejahteraan


sosial meningkat 21.0 mata. Dimensi kesejahteraan ekonomi merangkumi komponen seperti pengangkutan dan pendidikan, manakala dimensi sosial merangkumi komponen seperti perumahan, keselamatan awam, dan penyertaan sosial.

## Menambah baik akses kepada perkhidmatan penjagaan kesihatan berkualiti

Kerajaan telah menambah baik akses kepada perkhidmatan penjagaan kesihatan berkualiti dengan menaik taraf infrastruktur kesihatan,

Paparan 4-1

### Indeks Kesejahteraan Rakyat Malaysia, 2000-2012



Nota: IKRM mengukur komponen-komponen bagi kesejahteraan ekonomi dan sosial. Komponen kesejahteraan ekonomi terdiri daripada pengangkutan, komunikasi, pendidikan, persekitaran kerja serta pendapatan dan pengagihan. Kesejahteraan sosial pula terdiri daripada komponen perumahan, riadah, tadbir urus, keselamatan awam, penyertaan sosial, kebudayaan, kesihatan, alam sekitar dan keluarga.

Sumber: Laporan Kesejahteraan Rakyat Malaysia 2013

Paparan 4-2

**Petunjuk terpilih mengenai status kesihatan, 2010 dan 2014**

Petunjuk	2010	2014
Jangka hayat ketika lahir (tahun)	74.1	74.8
Kadar kematian bayi (bagi setiap 1,000 kelahiran hidup)	6.7	6.5
Nisbah kematian ibu (bagi setiap 100,000 kelahiran hidup)	26.1	25.5

Nota: Data 2014 merupakan data anggaran

Paparan 4-3

**Nisbah personel kesihatan kepada penduduk, 2010 dan 2014**

Jenis Personel	Bilangan		Nisbah kepada Penduduk	
	2010	2014	2010	2014
Doktor	32,980	51,835	1:859	1:581
Doktor Gigi	3,810	5,888	1:7,437	1:5,112
Ahli Farmasi	7,760	12,294	1:3,652	1:2,448
Jururawat	69,110	92,681	1:410	1:325

Nota: Data 2014 merupakan data awalan

meningkatkan kapasiti personel kesihatan, menggalakkan amalan gaya hidup sihat, dan memperluas program rawatan pencegahan penyakit ke seluruh negara. Hasil daripada usaha Kerajaan menambah baik sistem kesihatan ini dapat dilihat dalam peningkatan jangka hayat penduduk dan pengurangan jumlah kematian bayi dan ibu, seperti yang ditunjukkan dalam Paparan 4-2.

Akses kepada perkhidmatan penjagaan kesihatan telah dipertingkatkan melalui pembinaan hospital baharu termasuk institusi perubatan khusus seperti Institut Kanser Negara di Putrajaya dan Hospital Rehabilitasi Cheras. Selain itu, Klinik 1Malaysia dan Klinik Bergerak 1Malaysia telah ditambah bagi meningkatkan akses kepada perkhidmatan penjagaan kesihatan yang mampu dibiayai oleh isi rumah berpendapatan rendah. Sehingga tahun 2014, sebanyak 307 Klinik 1Malaysia telah diwujudkan di kawasan bandar dan 16 Klinik Bergerak 1Malaysia telah beroperasi menggunakan bas dan bot di kawasan luar bandar.

Bilangan katil di hospital awam dan swasta telah meningkat daripada 55,180 katil pada tahun 2010 kepada 58,530 katil pada tahun 2014. Daripada jumlah ini, bilangan katil di hospital awam adalah sebanyak 75%. Dalam tempoh yang sama, nisbah personel kesihatan berbanding penduduk juga meningkat seperti yang ditunjukkan dalam Paparan 4-3.

Bagi memupuk kesedaran mengenai amalan hidup sihat dalam kalangan masyarakat, Program Komuniti Sihat Perkasa Negara (KOSPEN) telah diperkenalkan bagi menggalakkan aktiviti fizikal serta pemakanan dan tingkah laku sihat. Di samping itu, program promosi kesihatan untuk mencegah penularan penyakit berjangkit telah diperluas termasuk Program Komunikasi untuk Perubahan Tingkah Laku (COMBI) khususnya bagi mengurangkan risiko denggi.

## Memastikan akses kepada perumahan mampu milik dan berkualiti

Bagi memenuhi keperluan perumahan mampu milik untuk isi rumah berpendapatan rendah dan sederhana, Kerajaan telah menyediakan pelbagai bentuk bantuan pembiayaan kepada pembeli rumah, dan memperkemas rangka kerja kawal selia untuk memudahkan pemilikan rumah. Perumahan mampu milik bagi isi rumah miskin dan berpendapatan rendah di kawasan bandar dan luar bandar telah dilaksanakan melalui program seperti Program Bantuan Rumah (PBR), Program Perumahan Rakyat (PPR) dan Rumah Mesra Rakyat 1Malaysia

(RMR1M) serta perumahan untuk generasi kedua peneroka Lembaga Kemajuan Tanah Persekutuan (FELDA) dan FELCRA Berhad (FELCRA).

Perumahan mampu milik untuk isi rumah berpendapatan sederhana pula telah dilaksanakan melalui program seperti Perumahan Rakyat 1Malaysia (PR1MA), Perumahan Penjawat Awam 1Malaysia (PPA1M) dan Rumah Wilayah Persekutuan (RUMAWIP). Pelbagai program perumahan yang telah dilaksanakan dan pencapaian mengikut kumpulan sasar adalah seperti yang ditunjukkan di Paparan 4-4.

Bagi memastikan semua perumahan mampu milik disenggara sewajarnya, Kerajaan telah melaksanakan Program Penyenggaraan Perumahan untuk perumahan awam kos rendah dan mewujudkan Tabung Perumahan 1Malaysia untuk perumahan swasta kos rendah dan sederhana. Di samping itu, program *MyBeautiful Malaysia* di

bawah Strategi Lautan Biru Kebangsaan dilaksanakan pada tahun 2014 untuk meningkatkan penyenggaraan kuarters Kerajaan.

Beberapa garis panduan seperti Garis Panduan Perancangan Kejiranan Hijau, Garis Panduan Tanah Lapang dan Rekreasi serta Garis Panduan Perancangan Fizikal bagi Warga Emas telah dirangka untuk memastikan persekitaran yang lebih kondusif dan sesuai didiami. Inisiatif ini telah membantu meningkatkan kualiti persekitaran dan kehidupan rakyat.

Akta Pemajuan Perumahan (Kawalan dan Pelesenan) 1996 (Akta 118) telah dipinda bagi meningkatkan perlindungan kepada pembeli rumah. Pindaan ini memberikan ruang bagi membolehkan tindakan undang-undang diambil ke atas pemaju yang tidak bertanggungjawab. Di samping itu, skim pembiayaan baharu telah diperkenalkan seperti

#### Paparan 4-4

### Program perumahan mampu milik awam yang telah dibina dalam Rancangan Malaysia Kesepuluh

Program	Pendapatan Isi Rumah Bulanan (RM)	Kementerian/Agensi	Unit Rumah		
			Siap	Dalam Pembinaan	Jumlah
Program Bantuan Rumah (PBR)	Bawah Pendapatan Garis Kemiskinan <sup>1</sup>	Kementerian Kemajuan Luar Bandar dan Wilayah	56,668	8,298	64,966
Program Perumahan Rakyat (PPR)	2,500 dan ke bawah	Kementerian Kesejahteraan Bandar, Perumahan dan Kerajaan Tempatan	12,025	27,087	39,112
Rumah Mesra Rakyat 1Malaysia (RMR1M)	750 hingga 3,000	Syarikat Perumahan Negara Berhad	32,948	2,803	35,751
Perumahan Rakyat 1Malaysia (PR1MA)	2,500 hingga 10,000	Perbadanan PR1MA Malaysia	560	18,400	18,960
Perumahan Penjawat Awam 1Malaysia (PPA1M)	2,500 hingga 10,000	Jabatan Perdana Menteri	-	13,539	13,539
Rumah Wilayah Persekutuan (RUMAWIP)	6,000 dan ke bawah	Kementerian Wilayah Persekutuan	-	9,309	9,309

Nota: PR1MA, PPA1M dan RUMAWIP dimulakan pada tahun 2013; data sehingga Mac 2015

<sup>1</sup> Pendapatan Garis Kemiskinan (PGK) merupakan tahap pendapatan yang digunakan untuk mengukur kemiskinan mutlak berasaskan kepada keperluan minimum makanan dan bukan makanan yang diperlukan oleh ahli isi rumah untuk kehidupan sihat dan aktif. Purata PGK bulanan bagi tahun 2014 ialah RM930 bagi Semenanjung Malaysia, RM1,170 bagi Sabah dan RM990 bagi Sarawak.



Skim Rumah Pertamaku, Skim Perumahan Belia dan Skim Perumahan Mampu Milik Swasta (*MyHome*) bagi menyediakan kemudahan pembiayaan untuk rakyat memiliki rumah pada harga yang berpatutan.

## Menjadikan jalanan lebih selamat dan masyarakat lebih tenteram

Bagi meningkatkan keberkesanan pencegahan jenayah, Bidang Keberhasilan Utama Negara (NKRA) Pengurangan Jenayah telah diperkenalkan untuk meningkatkan persepsi rasa selamat dalam kalangan rakyat, mengurangkan indeks jenayah, dan menambah baik perkhidmatan Polis DiRaja Malaysia (PDRM). Untuk mencapai matlamat ini, Kerajaan telah melaksanakan pelbagai usaha komprehensif seperti *omnipresence* di kawasan sering berlaku jenayah, operasi khas polis, dan penyertaan masyarakat yang lebih besar dalam aktiviti pengawasan kawasan kejiranan secara sukarela.

Usaha pencegahan jenayah tersebut telah mengurangkan kes jenayah daripada 166,300 pada tahun 2011 kepada 128,540 pada tahun 2014, seperti ditunjukkan dalam indeks jenayah. Kedudukan Malaysia bagi subindeks keselamatan dan ketenteraman awam dalam *World Justice Project (WJP) Rule of Law Index*<sup>1</sup> bertambah baik daripada tangga ke-16 pada tahun 2012/2013 kepada tangga ke-12 pada tahun 2014. Dalam tempoh yang sama, pemasangan kamera litar tertutup (CCTV) dan langkah pencegahan jenayah yang lain telah berjaya mengurangkan jenayah jalanan sebanyak 17.6%.

Pelaksanaan Program Bandar Selamat yang menggunakan pendekatan pencegahan jenayah seperti pemasangan rel penghadang dan CCTV di semua 151 Pihak Berkuasa Tempatan (PBT), meliputi 618 kawasan yang sering berlaku jenayah. Penilaian ke atas program ini yang dilaksanakan pada tahun 2012 menunjukkan 80% penduduk di kawasan tersebut berasa selamat, melebihi sasaran yang ditetapkan, iaitu 55%. Inisiatif Pemutihan Kawasan Black Spot di bawah Program Bandar Selamat telah diperkenalkan pada tahun 2013 yang memberikan tumpuan kepada kawasan yang cenderung berlaku jenayah. Pelaksanaannya yang merangkumi 76 PBT menunjukkan sebanyak 61% penduduk di kawasan tersebut berasa selamat, iaitu

melebihi sasaran 55%. Inisiatif ini juga dapat memperkukuh kerjasama antara masyarakat dengan agensi Kerajaan.

Program kepolisan masyarakat, iaitu Skim Rondaan Sukarela (SRS), dilaksanakan untuk mewujudkan persekitaran kejiranan yang lebih selamat. SRS ialah pengawasan jenayah berasaskan komuniti dan rondaan pada waktu malam di bawah Rukun Tetangga (RT) untuk mengurangkan jenayah di kawasan kediaman. Sebanyak 4,460 SRS berdaftar pada tahun 2014 berbanding dengan 2,910 pada tahun 2011. Pelaksanaan program kesukarelawanan ini bukan sahaja mengurangkan jenayah, malah dapat meningkatkan perpaduan masyarakat.

Sukarelawan Simpanan Polis (SSP) telah memainkan peranan penting dalam membantu PDRM menguatkuasakan undang-undang serta menjaga keamanan dan keselamatan awam. Jumlah SSP bertambah daripada 9,075 pada tahun 2011 kepada 25,260 pada tahun 2014. Pertambahan ini telah dapat meningkatkan *omnipresence*. Pada tahun 2013, rondaan bersama antara SRS, Angkatan Tentera Malaysia (ATM), dan PDRM telah dijalankan di bawah Program Rondaan Awam Polis dan Anggota Tentera (RAPAT 1Malaysia) meliputi 75 kawasan yang sering berlaku jenayah.

Penagihan dadah menyumbang kepada kejadian jenayah jalanan dan keganasan, yang boleh memberikan ancaman serius kepada kesejahteraan rakyat. Langkah yang dilaksanakan bagi membanteras masalah ini termasuk menghapuskan jenayah terancang dan sindiket dadah, serta memintas pengedaran dadah di sempadan, serta di pintu masuk dan keluar negara. Selain itu, kaedah rawatan dan program selepas pemulihan untuk penagih dadah diperkukuh melalui program pembangunan sendiri, kaunseling, dan Terapi Gantian Methadon (MMT). Sungguhpun kes penagihan dadah baharu berkurangan daripada 13,680 pada tahun 2011 kepada 13,270 pada tahun 2014, jumlah penagih dadah berulang meningkat daripada 5,848 kepada 7,956. Peningkatan ini disebabkan oleh terdapatnya dadah jenis sintetik yang diproses dalam negara dan stigma masyarakat yang berterusan terhadap bekas penagih dadah.

<sup>1</sup> *World Justice Project Rule of Law Index* merangkumi lapan komponen, iaitu kekangan kuasa pemerintah, tiada amalan rasuah, keterbukaan kerajaan, hak asasi, keselamatan dan ketenteraman, penguatkuasaan peraturan, keadilan undang-undang sivil, dan keadilan undang-undang jenayah. Faktor keselamatan dan ketenteraman mengukur tiga dimensi meliputi pelbagai ancaman: jenayah terutamanya jenayah konvensional seperti pembunuhan, penculikan, kecurian, rompakan bersenjata, pemerasan, dan penipuan; kekacauan politik termasuk keganasan, konflik bersenjata, dan pergolakan politik; dan keganasan sebagai cara yang diterima dalam masyarakat untuk menyatakan ketidakpuasan peribadi (ketidakpercayaan kepada sistem keadilan sedia ada).

Jabatan Penjara Malaysia telah mengubah pendekatan hukuman daripada pemenjaraan kepada koreksional dan pemulihan. Pemulihan banduan dilaksanakan melalui pelbagai kaedah, antaranya pertemuan bersemuka dengan keluarga, program pembangunan sendiri, dan pembebasan awal menerusi sistem parol. Selain itu, Program Pemulihan Pemasyarakatan (CRP) dilaksanakan untuk menyediakan latihan kemahiran teknikal bagi memastikan banduan mendapat pekerjaan apabila diintegrasikan ke dalam masyarakat dan mengurangkan kadar pengulang laku jenayah serta kesesakan di penjara. Dalam tempoh 2011-2014, kadar pengulang laku jenayah adalah antara 7% hingga 8%.

## Meningkatkan kesepaduan sosial dan perpaduan nasional

Pelbagai program kemasyarakatan telah dilaksanakan untuk memperkukuh integrasi sosial dan semangat kesukarelawanan, memupuk semangat toleransi dan perpaduan yang lebih erat dalam kalangan rakyat Malaysia. Jabatan Perpaduan Negara dan Integrasi Nasional (JPNIN) telah melaksanakan 875,590 aktiviti interaksi sosial melalui organisasi dan program seperti Kelab Rukun Negara, Sekretariat Rukun Negara, Integrasi Komuniti, Jaringan Sosial, Silang Budaya, dan Persefahaman antara Penganut Agama. Program tersebut telah dilaksanakan melalui kerjasama antara agensi kerajaan, sektor swasta, dan NGO.

Pelbagai inisiatif telah dilaksanakan untuk memupuk semangat kesukarelawanan dalam kalangan belia. *1Malaysia For Youth* (iM4U) ditubuhkan pada tahun 2012 sebagai sebuah NGO yang menganjurkan pelbagai program kesukarelawanan dengan komuniti setempat seperti *iM4U Flood Relief*, *Volunteer Malaysia*, dan *Reach Out Convention and Celebration*. Sementara itu, alumni Program Latihan Khidmat Negara yang dikenali sebagai Briged Sukarelawan Khidmat Negara juga menganjurkan program sukarelawan dalam pemuliharaan alam sekitar, sukan dan bantuan bencana alam.

Kerajaan telah menubuhkan Majlis Konsultasi Perpaduan Negara (MKPN) pada tahun 2013 sebagai satu inisiatif untuk memperkukuh kesepaduan sosial dan perpaduan nasional. MKPN telah diberikan mandat untuk menyediakan pelan pembangunan kebangsaan bagi kesepaduan sosial dan perpaduan nasional yang dijangka siap pada tahun 2015. Pelan pembangunan ini memberikan tumpuan

kepada usaha penyatupaduan melalui lima bidang utama, iaitu dasar dan perundangan, kebudayaan, belia, integrasi nasional, dan pembangunan inklusif. MKPN telah mengadakan 18 sesi dialog perpaduan di seluruh negara untuk meningkatkan persefahaman bagi mengukuhkan toleransi dan semangat integrasi dalam kalangan masyarakat berbilang kaum.

## Memupuk budaya sukan dan membangunkan bakat untuk meningkatkan kesejahteraan

Dalam tempoh RMKe-10, konsep “Sukan untuk Semua” telah dipromosikan untuk menggalakkan penyertaan yang lebih ramai dalam aktiviti sukan, rekreasi dan kecergasan. Sebanyak 417 program telah dilaksanakan dengan penyertaan 175,600 peserta termasuk 2,600 orang kurang upaya (OKU). Antara program utama ialah FitMalaysia dan Liga Sukan untuk Semua. Di samping itu, 1,871 Gelanggang Futsal 1Malaysia dan 89 gimnasium telah dibina untuk menyediakan kemudahan sukan dan menggalakkan penyertaan semua lapisan masyarakat.

Program Pembangunan Bakat dalam sukan berprestasi tinggi dilaksanakan untuk mengenal pasti dan melatih atlet yang berpotensi bagi menyertai kejohanan sukan utama seperti Sukan SEA, Sukan Komanwel, Sukan Asia, dan kejohanan dunia. Sehingga kini, 23,670 atlet yang berpotensi telah menyertai program latihan khas. Di samping itu, 74 atlet OKU yang berbakat telah diserap ke dalam Program Paralimpik MSN 2013. Pada tahun 2012, seramai 2,603 atlet OKU telah menyertai Karnival Sukan Orang Kurang Upaya, dan seramai 135 atlet OKU telah menyertai Sukan Paralimpik Asia Ke-11 di Korea Selatan pada tahun 2014.

Pencapaian Malaysia dalam kejohanan sukan utama pada peringkat antarabangsa adalah menggalakkan. Semasa Sukan Olimpik Ke-30 di London pada tahun 2012, Dato' Lee Chong Wei telah memenangi satu pingat perak dan Pandelega Rinong Ak Pong memenangi satu pingat gangsa. Pencapaian Malaysia juga cemerlang dalam pelbagai acara sukan seperti Sukan Komanwel Ke-20 di Glasgow pada tahun 2014 dengan memenangi enam pingat emas, di samping memenangi 43 pingat emas di Sukan SEA Ke-27 di Myanmar pada tahun 2013 dan 15 pingat emas di Sukan Paralimpik Asia Ke-11 di Incheon, Korea Selatan pada tahun 2014. Seramai 36 atlet Malaysia berada pada kedudukan 10 terbaik dunia pada tahun 2014, seperti yang ditunjukkan dalam Paparan

4-5. Atlet seperti Dato' Lee Chong Wei dan Dato' Nicol Ann David merupakan ikon antarabangsa kepada rakyat Malaysia dalam bidang sukan masing-masing.

\* \* \*

RMKe-10 telah menyaksikan perubahan yang ketara ke atas kesejahteraan rakyat Malaysia. Walau bagaimanapun, perubahan dalam kualiti hidup dan struktur sosioekonomi telah menyebabkan masyarakat menaruh harapan tinggi terhadap kualiti perkhidmatan Kerajaan. Dalam usaha Kerajaan untuk mencapai akses kepada kualiti penjagaan kesihatan sejagat, terdapat cabaran yang berterusan dalam memastikan kualiti penyampaian penjagaan kesihatan kepada golongan yang kurang mendapat akses kepada perkhidmatan, dan

menangani penularan penyakit berjangkit yang berpunca daripada gaya hidup. Peningkatan penawaran perumahan mampu milik terutamanya di kawasan bandar, serta kepada belia dan pasangan muda yang berkahwin masih tidak mencukupi untuk menampung permintaan. Keselamatan dan ketenteraman awam masih menjadi kebimbangan utama rakyat. Sementara itu, usaha penguatkuasaan undang-undang mengalami kesukaran kerana kurangnya kerjasama antara agensi dengan pihak berkepentingan. Penyertaan dalam sukan massa masih rendah walaupun akses dan kempen kesedaran telah ditambah baik, manakala semangat 1Malaysia dan kesepaduan sosial terjejas oleh pandangan dan persepsi polarisasi dalam masyarakat.

#### Paparan 4-5

### Atlet Malaysia di Kedudukan 10 Terbaik Dunia, 2014

Bil..	Atlet	Sukan	Kategori	Kedudukan Dunia
1.	Dato' Lee Chong Wei	Badminton	Perseorangan lelaki	Pertama
2.	Dato' Nicol Ann David	Skuasy	Perseorangan wanita	Pertama
3.	Sazali Abdul Samad	Bina Badan	75 kilogram lelaki	Pertama
4.	Lilian Tan	Bina Badan	55 kilogram wanita	Pertama
5.	<ul style="list-style-type: none"> <li>▪ Dato' Lee Chong Wei</li> <li>▪ Hoon Thien How</li> <li>▪ Tan Wee Kiong</li> <li>▪ Tan Boon Heong</li> <li>▪ Chong Wei Feng</li> <li>▪ Liew Darren</li> <li>▪ Goh Soon Huat</li> <li>▪ Goh V Shem</li> <li>▪ Lim Khim Wah</li> <li>▪ Chan Peng Soon</li> </ul>	Badminton	Berpasukan lelaki	Kedua
6.	Syakilla Salni Jefry Krishnan	Karate	Bawah 61 kilogram wanita	Kedua
7.	<ul style="list-style-type: none"> <li>▪ Emanuel Leong Teng Kwang</li> <li>▪ Ho Ying Thomsan</li> <li>▪ Ricky Leong Tze Wai</li> </ul>	Karate	Kata Berpasukan Lelaki	Ketiga
8.	Hizlee Rais	Boling Padang	Perseorangan lelaki	Ketiga
9.	<ul style="list-style-type: none"> <li>▪ Leong Mun Yee</li> <li>▪ Pandelega Rinong Ak Pamg</li> </ul>	Akuatik – Terjun	10 meter platform seirama wanita	Ketiga
10.	Pandelega Rinong Ak Pamg	Akuatik – Terjun	10 meter platform individu wanita	Keempat
11.	Fatehah Mustapa	Berbasikal Trek	Keirin wanita	Keempat
12.	<ul style="list-style-type: none"> <li>▪ Izurin Refin</li> <li>▪ Mohd Hanafiah Dolah</li> <li>▪ Mohd Muqlis Borhan</li> <li>▪ Mohd Shahir Rosdi</li> <li>▪ Mohd Khairul Zaman</li> </ul>	Sepak Takraw	Regu lelaki	Keempat
13.	<ul style="list-style-type: none"> <li>▪ Ng Yan Yee</li> <li>▪ Cheong Jun Hoong</li> </ul>	Akuatik – Terjun	3 meter papan anjal seirama wanita	Kelima
14.	Cheong Jun Hoong	Akuatik – Terjun	3 meter papan anjal individu wanita	Ketujuh
15.	Low Wee Wern	Skuasy	Perseorangan wanita	Ketujuh
16.	<ul style="list-style-type: none"> <li>▪ Noor Fairuz Azizan</li> <li>▪ Nor Farhana Ismail</li> <li>▪ Rahilah Harun</li> <li>▪ Emilia Eva Natasha</li> <li>▪ Nurul Izzatul Hikmah Zulkifli</li> </ul>	Sepak Takraw	Regu wanita	Ketujuh
17.	<ul style="list-style-type: none"> <li>▪ Ooi Tze Liang</li> <li>▪ Ahmad Amsyar Azman</li> </ul>	Akuatik – Terjun	3 meter papan anjal seirama lelaki	Kesembilan

Sumber: Majlis Sukan Negara (MSN), Kementerian Belia dan Sukan (KBS)

# Ringkasan bidang fokus Rancangan Malaysia Kesebelas, 2016 – 2020



## Mencapai akses secepat kepada penjagaan kesihatan berkualiti

Meningkatkan sokongan yang bersasar, khususnya bagi masyarakat yang kurang mendapat akses kepada perkhidmatan

Menambah baik sistem penyampaian untuk outcome kesihatan yang lebih baik

Memperluas kapasiti bagi meningkatkan akses kepada perkhidmatan penjagaan kesihatan

Mempergiat kerjasama antara sektor awam, swasta dan NGO untuk meningkatkan kesedaran kesihatan



## Menyediakan perumahan mampu milik yang mencukupi dan berkualiti kepada isi rumah miskin, berpendapatan rendah dan sederhana

Meningkatkan akses kepada perumahan mampu milik mengikut kumpulan sasaran

Memperkuh perancangan dan pelaksanaan untuk pengurusan perumahan awam yang lebih baik

Menggalakkan penyediaan kemudahan yang mesra alam sekitar untuk mewujudkan perumahan yang berdaya huni



## Mewujudkan persekitaran hidup lebih selamat untuk masyarakat yang berdaya maju dan sejahtera

Mempertingkatkan pencegahan jenayah oleh agensi penguat kuasa, sektor swasta, dan masyarakat untuk meningkatkan persepsi rasa selamat

Memperketat peraturan dan meningkatkan penguatkuasaan untuk membanteras jenayah

Meningkatkan kesedaran tentang jenayah sebagai langkah pencegahan

Memperkuh pemulihan, rawatan, dan program selepas pemulihan untuk mengurangkan kadar pengulang laku jenayah dan penagih dadah berulang



## Meningkatkan keselamatan jalan raya dan perkhidmatan kecemasan untuk mengurangkan fataliti

Meningkatkan keselamatan jalan raya untuk mengurangkan kemalangan

Menambah baik perkhidmatan kecemasan untuk menyelamatkan nyawa



## Membudayakan semangat 1Malaysia untuk memperkukuh kesepaduan sosial dan perpaduan nasional

Menggalakkan integrasi sosial dan etika untuk memupuk masyarakat yang bersatu dan bermoral

Menggiatkan penglibatan pihak berkepentingan untuk membina rasa tanggungjawab bersama



## Menggiatkan sukan untuk kehidupan yang sihat dan memupuk perpaduan

Menggalakkan penyertaan dalam sukan massa di semua peringkat masyarakat untuk membudayakan sukan

Membangunkan kepimpinan belia dalam sukan

Membangunkan atlet berprestasi tinggi untuk mencapai reputasi global



### Indeks Kesejahteraan Rakyat Malaysia

Meningkat setiap tahun berbanding 1.2% dalam RMKe-10



Mencapai akses sejagat kepada penjagaan kesihatan berkualiti



2.3 katil hospital<sup>1</sup> bagi setiap 1,000 penduduk




Meningkatkan nisbah doktor kepada penduduk

Menyediakan perumahan mampu milik yang mencukupi dan berkualiti kepada isi rumah miskin, berpendapatan rendah dan sederhana



Membina/membaiki 47,000 rumah untuk isi rumah miskin



Membina 606,000 rumah untuk isi rumah berpendapatan rendah dan sederhana

Membudayakan semangat 1Malaysia untuk memperkukuh kesepaduan sosial dan perpaduan nasional




Jumlah sekolah menubuhkan Kelab Rukun Negara

Mewujudkan persekitaran hidup lebih selamat untuk masyarakat yang berdaya maju dan sejahtera



Meningkatkan persepsi rasa selamat



Mengurangkan indeks jenayah setiap tahun

Menggiatkan sukan untuk kehidupan yang sihat dan memupuk perpaduan



Sekurang-kurangnya 50% rakyat Malaysia membudayakan sukan

Meningkatkan keselamatan jalan raya dan perkhidmatan kecemasan untuk mengurangkan fataliti



Menambah baik masa respons kecemasan



Mengurangkan indeks fataliti akibat kemalangan jalan raya bagi setiap 10,000 kenderaan berdaftar



Menambah baik masa respons polis

<sup>1</sup> Katil di hospital awam dan swasta, pusat jagaan perbidanan dan kejururawatan, hospis dan pusat rawatan harian

# Hala tuju

## Rancangan Malaysia Kesebelas, 2016 - 2020

Matlamat Rancangan Malaysia Kesebelas adalah untuk membolehkan semua rakyat Malaysia mencapai taraf kehidupan yang berkualiti dan selesa tanpa mengira di mana mereka tinggal atau pendapatan mereka.

Pada tahun 2020, Malaysia berhasrat untuk menjadi sebuah negara maju dalam pelbagai dimensi. Hasrat ini bukan hanya untuk menjadi negara berpendapatan tinggi tetapi juga membina masyarakat penyayang dan inklusif yang berlandaskan etika dan moral, serta benar-benar erat dan bersatu padu. Aspirasi ini akan didorong oleh penghayatan konsep 1Malaysia, berasaskan prinsip Perlembagaan Persekutuan dan Rukun Negara. Kesejahteraan rakyat memainkan peranan penting dalam merealisasikan aspirasi ini.

Dalam tempoh RMKe-11, Kerajaan akan mempertingkatkan usaha untuk mencapai akses sejagat kepada penjagaan kesihatan yang berkualiti dengan menyasarkan kawasan yang kurang mendapat akses kepada perkhidmatan, meningkatkan kapasiti melalui fasiliti, dan personel kesihatan. Akses kepada perumahan mampu milik yang berkualiti akan terus dipertingkatkan dengan memperluas dan memperkukuh program sedia ada kepada isi rumah miskin, berpendapatan rendah dan sederhana, serta menyediakan peluang pemilikan rumah kepada belia. Bagi mewujudkan persekitaran hidup yang lebih selamat, Kerajaan akan meningkatkan program kepolisan masyarakat, *omnipresence*, dan keupayaan anggota penguat kuasa, serta memperkukuh kerjasama antara agensi. Strategi bagi meningkatkan kesedaran keselamatan jalan raya dan keberkesanan perkhidmatan kecemasan

akan diperkenalkan. Program kesepaduan sosial dan perpaduan akan diperkukuh untuk meningkatkan kefahaman mengenai kepelbagaian melalui interaksi dan perkongsian pengalaman seperti aktiviti kesukarelawanan berasaskan komuniti. Kerajaan akan terus menggalakkan penglibatan dalam sukan massa untuk meningkatkan kesihatan fizikal dan kecerdasan minda yang akan memberikan manfaat kepada negara. Program untuk mengenal pasti dan membina bakat sukan bertaraf dunia akan dipertingkat untuk membolehkan Malaysia bersaing pada peringkat antarabangsa. Indeks Kesejahteraan Rakyat Malaysia yang mengukur kemajuan negara dalam aspek kualiti hidup rakyat dijangka akan meningkat sebanyak 1.7% setahun dalam tempoh RMKe-11.

Secara keseluruhan, peningkatan dalam aspek di atas akan menyokong misi Kerajaan untuk membolehkan semua rakyat Malaysia mencapai taraf kehidupan yang berkualiti dan selesa tanpa mengira di mana mereka tinggal atau pendapatan mereka. Bagi mencapai kemajuan ini, Kerajaan akan mengambil langkah yang lebih bersasar untuk membantu kumpulan yang memerlukan, memperkemas sistem penyampaian di semua agensi untuk mengoptimumkan penggunaan sumber awam, dan mempergiat intervensi yang bersepadu melalui kerjasama dan penyertaan semua pihak berkepentingan merangkumi

sektor awam dan swasta serta NGO. Langkah-langkah ini penting memandangkan seluruh rakyat dan pihak berkepentingan mempunyai tanggungjawab bersama untuk membina kesepaduan dalam masyarakat seperti yang dihasratkan oleh pemimpin negara sebelum ini dan menjadi impian dan harapan generasi masa hadapan.

Kesemua aspirasi ini boleh dicapai di bawah RMKe-11 melalui bidang fokus seperti berikut:

- Bidang fokus A: Mencapai akses sejagat kepada penjagaan kesihatan berkualiti
- Bidang fokus B: Menyediakan perumahan mampu milik yang mencukupi dan berkualiti kepada isi rumah miskin, berpendapatan rendah dan sederhana
- Bidang fokus C: Mewujudkan persekitaran hidup lebih selamat untuk masyarakat yang berdaya maju dan sejahtera
- Bidang fokus D: Meningkatkan keselamatan jalan raya dan perkhidmatan kecemasan untuk mengurangkan fataliti
- Bidang fokus E: Membudayakan semangat 1Malaysia untuk memperkukuh kesepaduan sosial dan perpaduan nasional
- Bidang fokus F: Menggiatkan sukan untuk kehidupan yang sihat dan memupuk perpaduan



## Bidang fokus A

# Mencapai akses sejagat kepada penjagaan kesihatan berkualiti

Kesihatan yang baik adalah penting untuk meningkatkan kualiti hidup. Oleh itu, Kerajaan terus komited untuk mencapai akses sejagat kepada penjagaan kesihatan berkualiti dalam tempoh Rancangan dengan meneruskan usaha untuk menambah baik asas sistem kesihatan. Setiap rakyat Malaysia akan mempunyai akses yang sama kepada perkhidmatan penjagaan kesihatan berkualiti pada kos yang berpatutan yang disediakan oleh penyedia perkhidmatan awam atau swasta. Aspirasi ini akan direalisasikan melalui empat strategi:

- **Strategi A1: Meningkatkan sokongan yang bersasar, khususnya bagi masyarakat yang kurang mendapat akses kepada perkhidmatan.** Inisiatif khusus termasuk perkhidmatan kesihatan bergerak, penambahbaikan pasukan kesihatan primer, dan penjagaan kesihatan di kediaman;
- **Strategi A2: Menambah baik sistem penyampaian untuk outcome kesihatan yang lebih baik.** Langkah yang akan diambil termasuk memperkenalkan amalan pengurusan kejut di hospital awam untuk memastikan keupayaan sumber dimanfaatkan sepenuhnya, dan penguatkuasaan peraturan kesihatan yang lebih baik untuk meningkatkan ketelusan dan outcome kesihatan;
- **Strategi A3: Memperluas kapasiti bagi meningkatkan akses kepada perkhidmatan penjagaan kesihatan.** Inisiatif yang akan dilaksanakan termasuk pembangunan kemudahan kesihatan baharu dan menaik taraf kemudahan sedia ada. Usaha juga akan ditumpu untuk meningkatkan keupayaan dan kebolehan personel kesihatan; dan

- **Strategi A4: Mempergiat kerjasama antara sektor awam, swasta, dan NGO untuk meningkatkan kesedaran kesihatan.** Kerjasama ini akan merangkumi pelbagai inisiatif, daripada program kesihatan masyarakat dan pencegahan, kepada usaha penyelidikan dan pembangunan antara industri, universiti, dan institusi penyelidikan.

## Strategi A1

### Meningkatkan sokongan yang bersasar, khususnya bagi masyarakat yang kurang mendapat akses kepada perkhidmatan

Akses kepada penjagaan kesihatan yang berkualiti, terutamanya di kawasan dan masyarakat yang kurang mendapat liputan di bandar dan luar bandar akan diperluas. Ini termasuk peluasan perkhidmatan kepada isi rumah miskin dan berpendapatan rendah, Orang Asli di Semenanjung Malaysia, dan kawasan luar bandar dan pedalaman di Sabah dan Sarawak. Langkah ini termasuk menempatkan lebih ramai pakar dalam bidang perubatan dan kesihatan serta personel berkemahiran, mewujudkan lebih banyak kemudahan penjagaan kesihatan di kawasan yang amat memerlukan, dan mengembangkan program jangkauan kesihatan. Sebagai contoh, pasukan penjagaan kesihatan bergerak, perkhidmatan doktor udara, dan sukarelawan kesihatan kampung akan diperluas di kawasan pedalaman.



Program penjagaan kesihatan di kediaman akan diperluas bagi merangkumi program penjagaan untuk pesakit yang memerlukan penjagaan jangka panjang selepas dibenar keluar awal daripada hospital, seperti pesakit angin ahmar. Melalui program seumpama ini, personel kesihatan akan melatih ahli keluarga dan penjaga bagi membolehkan mereka menjaga pesakit di rumah. NGO juga akan digalakkan untuk menyertai dengan memberikan sokongan dan perkhidmatan kepada pesakit dan keluarga mereka.

Penjagaan kesihatan secara bersepadu akan ditambah baik melalui pasukan penjagaan kesihatan primer untuk meningkatkan akses, kualiti, dan kecekapan. Klinik kesihatan terpilih akan dinaik taraf kepada klinik yang lengkap dengan pelbagai disiplin perkhidmatan untuk menyokong dan meningkatkan keupayaan pasukan penjagaan kesihatan primer.

## Strategi A2 Menambah baik sistem penyampaian untuk outcome kesihatan yang lebih baik

Kerajaan akan mengkaji semula dan menggubal undang-undang berkaitan kesihatan dan mempergiat penguatkuasaan melalui pengukuhan penyelarasan antara agensi kerajaan dengan sektor swasta. Sebagai contoh, Kerajaan akan memperkemas unit penguatkuasaan yang berkaitan bidang kesihatan seperti farmaseutikal, kawalan penyakit, keselamatan makanan, kebersihan kawasan, serta amalan perubatan dan profesionalisme.

Perkhidmatan kesihatan pula akan mengguna pakai pendekatan pengurusan kejut dengan memperkemas proses dan prosedur kerja untuk meningkatkan keberkesanan dan kecekapan. Pendekatan ini termasuk mengoptimumkan pengurusan katil dan penggunaan dewan bedah, serta menggunakan amalan terbaik dalam rawatan. Outcome

yang diharapkan termasuk memanfaatkan keupayaan sumber sedia ada seperti penggunaan katil hospital, memendekkan masa menunggu pesakit, menambah baik keadaan dan kepuasan pesakit, dan penggunaan sumber penjagaan kesihatan secara optimum. Kerajaan juga akan melaksanakan konsep hospital kluster di kawasan terpilih, melibatkan beberapa hospital dalam lingkungan geografi yang sama dan akan berfungsi sebagai satu unit serta berkongsi sumber seperti aset, kemudahan, dan personel.

Kerajaan akan melaksanakan strategi *eHealth* yang menggabungkan sistem ICT sedia ada menjadi satu model sistem menyeluruh untuk meningkatkan pengurusan data kesihatan dan menyokong inisiatif penyelidikan, pembangunan, dan pengkomersialan (R&D&C). Kerajaan akan juga bekerjasama dengan sektor swasta untuk meningkatkan perkongsian maklumat dan mengukuhkan peranan sektor swasta dalam penyampaian perkhidmatan. Bagi memacu inovasi melalui aktiviti R&D&C, kerjasama yang melibatkan empat pihak utama, iaitu kerajaan, industri, universiti, dan institusi penyelidikan akan digalakkan.

Tumpuan juga akan diberikan untuk meningkatkan penjagaan prahospital seperti perkhidmatan ambulans dan perkhidmatan kemalangan dan kecemasan. Kerjasama dalam kalangan agensi yang menyediakan perkhidmatan ambulans, penyedia penjagaan kesihatan swasta dan NGO akan diperkukuh untuk menambah baik masa respons dan meningkatkan lagi kecekapan penggunaan sumber.

### Strategi A3

## Memperluas kapasiti bagi meningkatkan akses kepada perkhidmatan penjagaan kesihatan

Kemudahan dan aset penjagaan kesihatan sedia ada akan dinaik taraf, manakala pembangunan kemudahan baharu akan mengambil kira fungsi, keberkesanan kos, dan keperluan masyarakat setempat. Dalam hal ini, sektor swasta akan digalakkan untuk bekerjasama dan menubuhkan lebih banyak kemudahan penjagaan kesihatan yang memenuhi keperluan golongan isi rumah berpendapatan rendah dan sederhana. Bilangan dan agihan pakar dalam bidang perubatan dan kesihatan, serta personel berkemahiran juga akan dipertingkatkan dengan mengkaji semula dasar, insentif, dan program bina upaya. Pakej insentif akan dikaji semula untuk menarik personel kesihatan supaya berkhidmat di kawasan luar bandar dan pedalaman.

### Strategi A4

## Mempergiat kerjasama antara sektor awam, swasta dan NGO untuk meningkatkan kesedaran kesihatan

Langkah akan diambil untuk mengurangkan penyakit berjangkit dan penyakit tidak berjangkit termasuk penyediaan perkhidmatan berkaitan pencegahan penyakit dan promosi amalan gaya hidup sihat. Sektor swasta akan digalakkan untuk menjalankan program tanggungjawab sosial korporat (CSR), dan bekerjasama dengan Kerajaan dalam penyelidikan dan pembangunan. Di samping itu, NGO akan digalakkan untuk menjalankan aktiviti berbentuk sokongan kepada perkhidmatan kesihatan, pemeriksaan kesihatan, dan intervensi awal kesihatan serta turut bekerjasama dengan sektor swasta dalam melaksanakan program CSR yang berkaitan kesihatan. Penyertaan masyarakat dalam program kesihatan seperti penggunaan taman awam dan kawasan rekreasi untuk menggalakkan amalan gaya hidup sihat juga akan dipergiat.

Program intervensi seperti KOSPEN yang mana masyarakat akan dilatih untuk mempromosi kesihatan, akan terus dilaksanakan bagi menangani penyakit yang berkaitan gaya hidup. Di samping itu, program Komuniti Bebas Aedes & Tuberkulosis (COMBAT) akan dipertingkatkan untuk mengawal penyakit berjangkit melalui inisiatif kemasyarakatan seperti gotong-royong bagi menggalakkan persekitaran yang sihat serta mengurangkan penularan penyakit.



## Bidang fokus B

# Menyediakan perumahan mampu milik yang mencukupi dan berkualiti kepada isi rumah miskin, berpendapatan rendah dan sederhana

Perumahan mampu milik merupakan satu platform untuk mewujudkan komuniti yang kuat dan kukuh dengan keberhasilan yang lebih baik dalam aspek ekonomi, pendidikan dan kesihatan kepada individu, keluarga dan masyarakat. Justeru, Kerajaan akan terus menyediakan perumahan mampu milik kepada isi rumah miskin, berpendapatan rendah dan sederhana, dengan perbezaan tahap bantuan berasaskan keperluan. Impian untuk memiliki rumah pertama akan menjadi kenyataan serta dapat menyediakan asas kukuh bagi kemajuan seterusnya. Kesemua aspirasi ini dapat dicapai melalui tiga strategi:

- **Strategi B1: Meningkatkan akses kepada perumahan mampu milik mengikut kumpulan sasaran.** Strategi ini akan dilaksanakan dengan meneruskan program sedia ada kepada isi rumah miskin, berpendapatan rendah dan sederhana, pelaksanaan program yang disasarkan kepada belia dan pasangan muda yang berkahwin, serta memudah cara penyertaan sektor swasta yang lebih besar;
- **Strategi B2: Memperkukuh perancangan dan pelaksanaan untuk pengurusan perumahan awam yang lebih baik.** Langkah di bawah strategi ini termasuk pembangunan pangkalan data bersepadu untuk memadankan penawaran dan permintaan, dan pewujudan bank tanah untuk projek pembangunan masa hadapan; dan
- **Strategi B3: Menggalakkan penyediaan kemudahan yang mesra alam sekitar untuk mewujudkan perumahan yang berdaya huni.** Strategi ini akan dicapai melalui pengukuhan rangka kerja kawal selia, dan kerjasama dalam kalangan masyarakat dan NGO.

## Strategi B1

### Meningkatkan akses kepada perumahan mampu milik mengikut kumpulan sasaran

Kerajaan akan terus memainkan peranan utama dalam memenuhi keperluan perumahan untuk golongan sasaran di kawasan bandar dan luar bandar dengan meneruskan program sedia ada yang telah berjaya. Program ini termasuk PBR untuk golongan miskin, dan program seperti RMR1M, PPR, PR1MA dan PPA1M untuk isi rumah berpendapatan rendah dan sederhana serta program perumahan untuk generasi kedua peneroka FELDA dan FELCRA. Di samping itu, skim pembiayaan seperti Skim Rumah Pertamaku, Skim Perumahan Belia dan *MyHome* akan dipertingkatkan untuk menambah baik akses dan kemampuan isi rumah berpendapatan rendah dan sederhana.

Rumah transit akan dibina di kawasan bandar untuk belia dan pasangan muda yang berkahwin termasuk cadangan pembinaan di bawah program Bandar Belia 1Malaysia. Rumah transit ini menyediakan kediaman sementara kepada keluarga berkenaan bagi membolehkan mereka menabung untuk membeli rumah pertama mereka. Sektor swasta akan digalakkan untuk membangunkan perumahan awam, yang boleh dilaksanakan melalui kerjasama awam-swasta.

## Strategi B2

### Memperkuh perancangan dan pelaksanaan untuk pengurusan perumahan awam yang lebih baik

Bagi menambah baik perancangan dan pembangunan perumahan mampu milik, satu pangkalan data bersepadu yang boleh dicapai oleh semua pihak berkepentingan akan diwujudkan untuk memastikan penawaran dipadankan dengan permintaan mengikut tempat, harga dan kumpulan sasar. Selain itu, bank tanah akan diwujudkan untuk pembangunan perumahan mampu milik, terutama di kawasan bandar. Kerjasama antara Jabatan Perumahan Negara dengan majlis agama Islam negeri akan dimanfaatkan untuk mengenal pasti tanah wakaf dan baitulmal yang berpotensi untuk dibangunkan.

## Strategi B3

### Menggalakkan penyediaan kemudahan yang mesra alam sekitar untuk mewujudkan perumahan yang berdaya huni

Kerajaan akan menggalakkan pembangunan semua perumahan mampu milik yang baharu mempraktikkan amalan mampan, serta menyediakan kemudahan dan infrastruktur yang mesra alam sekitar dan berdaya huni untuk rakyat, termasuk OKU dan warga emas. Kadar sewa perumahan awam akan dikaji semula bagi memastikan dana yang mencukupi untuk menampung kos pengurusan dan penyenggaraan perumahan awam yang standard.

Penglibatan masyarakat akan digalakkan untuk mengutamakan tanggungjawab bersama dalam penyenggaraan perumahan. Program kesedaran dalam kalangan penduduk untuk memupuk budaya penyenggaraan, kebersihan serta pencegahan *vandalism* akan dipertingkat melalui kerjasama antara masyarakat dengan NGO. *MyBeautiful Malaysia* akan diteruskan untuk menggalakkan persekitaran hidup yang selesa dan memupuk budaya kebersihan dalam kalangan penghuni.



## Bidang fokus C

# Mewujudkan persekitaran hidup lebih selamat untuk masyarakat yang berdaya maju dan sejahtera

Keselamatan awam adalah penyumbang utama kepada pembangunan masyarakat yang berdaya maju dan sejahtera kerana perasaan takut menjadi mangsa jenayah akan mengehendak pergerakan individu, mengganggu ketenangan fikiran, dan menjejaskan pelaburan di kawasan cenderung berlaku jenayah. Kerajaan komited melaksanakan usaha untuk mewujudkan persekitaran hidup yang lebih selamat. Usaha ini akan mengurangkan kadar jenayah, serta meningkatkan persepsi rasa selamat dan keyakinan orang awam terhadap agensi penguatkuasaan undang-undang. Matlamat ini akan dicapai melalui empat strategi:

- **Strategi C1 : Mempertingkatkan pencegahan jenayah oleh agensi penguat kuasa, sektor swasta, dan masyarakat untuk meningkatkan persepsi rasa selamat.** Strategi ini termasuk memperkukuh keupayaan dan kebolehan anggota penguat kuasa, meningkatkan kerjasama dalam kalangan agensi penguat kuasa, sektor swasta, NGO, dan masyarakat terutamanya melalui program kepolisan masyarakat;
- **Strategi C2: Memperketat peraturan dan meningkatkan penguatkuasaan untuk membanteras jenayah.** Strategi ini termasuk memperkukuh perundangan, meningkatkan penggunaan pendekatan pencegahan jenayah, menambah baik pengurusan pekerja asing, dan membanteras jenayah rentas sempadan;
- **Strategi C3: Meningkatkan kesedaran tentang jenayah sebagai langkah pencegahan** melalui kempen di sekolah dan media sosial. Program ini menyasarkan kumpulan berisiko tinggi, terutamanya golongan belia; dan

- **Strategi C4: Memperkukuh pemulihan, rawatan, dan program selepas pemulihan untuk mengurangkan kadar pengulang laku jenayah dan penagih dadah berulang.** Pelbagai program pembangunan sendiri dan perkhidmatan berasaskan masyarakat akan dipergiat bagi memastikan keberkesanan pengintegrasian bekas banduan dan penagih dadah ke dalam masyarakat. Usaha ini juga dapat mengurangkan kadar pengulang laku jenayah dan penagih dadah berulang.

## Strategi C1

### Mempertingkatkan pencegahan jenayah oleh agensi penguat kuasa, sektor swasta, dan masyarakat untuk meningkatkan persepsi rasa selamat

Pencegahan jenayah akan dipergiat melalui *omnipresence*, Program Bandar Selamat, dan kesukarelawanan. Program tersebut menyasarkan pengurangan indeks jenayah sebanyak 5% setahun dan meningkatkan persepsi rasa selamat daripada 39% pada tahun 2014 kepada 60% pada tahun 2020. *Omnipresence* akan dipertingkatkan dengan menempatkan semula lebih ramai anggota polis untuk melaksanakan tugas hakiki kepolisan, khususnya pencegahan jenayah. Masa respons polis terhadap panggilan kecemasan akan dipercepat daripada 12 minit kepada lapan minit, khususnya di kawasan bandar dan bandar raya dengan pelaksanaan lebih meluas sistem Perintah, Kawalan, Komunikasi, dan Integrasi Komputer (C4i).

Keupayaan dan kebolehan anggota penguat kuasa akan diperkukuh dengan menyediakan peralatan yang sesuai dan melaksanakan program pembangunan keupayaan. Sebagai contoh, kerjasama dengan badan kepolisan antarabangsa akan dimanfaatkan untuk meningkatkan pengetahuan dan kemahiran menerusi program pertukaran pegawai dan latihan khusus. Integriti anggota penguat kuasa akan dipertingkatkan melalui program kesedaran oleh Institut Integriti Malaysia di samping pengawasan yang menyeluruh oleh Suruhanjaya Pencegahan Rasuah Malaysia dan Suruhanjaya Integriti Agensi Penguatkuasaan.

Kerjasama dalam kalangan agensi penguat kuasa akan diperkukuh melalui penubuhan pasukan petugas dan pembangunan pangkalan data bersepadu. Operasi dan rondaan bersama akan dipertingkatkan bagi mempercepat kadar respons dan mengoptimumkan penggunaan sumber dan tenaga kerja untuk membanteras jenayah rentas sempadan. Di samping itu, Kerajaan akan memanfaatkan sepenuhnya hubungan dua hala dan pelbagai hala untuk mengekang jenayah seperti pemerdagangan manusia dan penyeludupan.

Penyertaan orang awam dalam program kepolisan masyarakat juga akan digalakkan melalui aktiviti SRS dan SSP. Peranan Jabatan Pencegahan Jenayah dan Keselamatan Komuniti (JPJKK) akan dimantapkan bagi memperkukuh kerjasama antara polis dengan masyarakat dalam pencegahan jenayah. Pihak swasta akan digalakkan untuk memasang CCTV yang dihubungkan dengan pusat kawalan PDRM menerusi rangkaian platform terbuka di kawasan sering berlaku jenayah.

## Strategi C2

### Memperketat peraturan dan penguatkuasaan untuk membanteras jenayah

Undang-undang dan peraturan sedia ada akan ditambah baik bagi meningkatkan keberkesanan dalam pencegahan jenayah. Reka Bentuk Persekitaran Selamat (*Crime Prevention Through Environmental Design*, CPTED) akan dijadikan komponen pembangunan kawasan perumahan dan komersial baharu. Langkah pencegahan kecurian di tempat kediaman seperti pemasangan CCTV dan alat penggera keselamatan akan digalakkan sebagai sebahagian daripada usaha kawalan sendiri.

Pengurusan pengambilan pekerja asing akan ditambah baik dengan meningkatkan peranan pusat sehenti dan kerjasama antara Jabatan Imigresen Malaysia dengan PBT untuk memastikan keberkesanan penguatkuasaan. Sementara itu, prosedur saringan yang lebih ketat akan dilaksanakan di negara sumber bagi mengelakkan penyalahgunaan visa pelajar. Penguatkuasaan peraturan yang lebih tegas akan dilaksanakan bagi memastikan IPT yang mengambil pelajar asing mematuhi prosedur imigresen.

Kemasukan secara tidak sah di pos pemeriksaan imigresen akan dikekang melalui pelaksanaan Sistem Pengimbasan Penumpang Termaju (APSS), sistem biometrik, dan sistem pengecaman muka. Kawalan dan operasi bersama dalam kalangan agensi penguatkuasaan sempadan seperti Agensi Penguatkuasaan Maritim Malaysia, Unit Pencegahan Penyeludupan, dan ATM akan diperkukuh bagi membanteras jenayah rentas sempadan. Usaha ini akan dilaksanakan menerusi penambahbaikan keupayaan pengesanan, pemantauan, dan pengawasan secara bersepadu termasuk pembinaan pangkalan laut (*sea basing*) bagi mencegah pencerobohan sempadan.

### Strategi C3

#### Meningkatkan kesedaran tentang jenayah sebagai langkah pencegahan

Kerajaan akan melaksanakan kempen bersasar melalui media sosial kepada kumpulan berisiko tinggi terutamanya belia. Kumpulan sasar ini akan diberikan pendidikan mengenai bahaya dadah dan jenayah, mengelak daripada menjadi mangsa jenayah, serta penggunaan laman web dan media sosial secara bertanggungjawab. Di samping itu, CyberSecurity Malaysia dan Kementerian Pendidikan Malaysia akan melaksanakan program *CyberSAFE in Schools* bagi memupuk amalan penggunaan dalam talian yang selamat untuk melindungi golongan muda daripada terdedah kepada kandungan yang negatif.

### Strategi C4

#### Memperkuh pemulihan, rawatan, dan program selepas pemulihan untuk mengurangkan kadar pengulang laku jenayah dan penagih dadah berulang

Usaha pemulihan, rawatan, dan program selepas pemulihan untuk penagih dadah dan banduan akan diperkuh bagi mencapai sasaran pengurangan kadar pengulang laku jenayah kepada 5% dan kadar penagih dadah berulang kepada 35% pada tahun 2020. Kerajaan akan memperkuh program pembangunan sendiri yang menyediakan latihan kemahiran dan keusahawanan, serta mewujudkan lebih banyak rumah transit kepada bekas banduan bagi mengurangkan kadar pengulang laku jenayah. CRP akan diperkenalkan untuk penagih dadah melalui kerjasama antara Agensi Antidadah Kebangsaan dengan agensi berkaitan. Di samping itu, NGO akan digalakkan untuk menyediakan perkhidmatan sokongan dalam pemulihan, rawatan, dan penyatuan ke dalam masyarakat seperti program selepas pemulihan dan penempatan pekerjaan.



## Bidang fokus D

# Meningkatkan keselamatan jalan raya dan perkhidmatan kecemasan untuk mengurangkan fataliti

Keselamatan jalan raya dan perkhidmatan kecemasan dikenal pasti sebagai bidang fokus baharu yang penting dalam RMKe-11 untuk meningkatkan kesejahteraan rakyat. Kerajaan berhasrat untuk mengurangkan insiden kemalangan jalan raya dan menambah baik penyampaian perkhidmatan kecemasan supaya setanding dengan standard antarabangsa. Aspirasi ini akan dapat dicapai melalui dua strategi:

- **Strategi D1: Meningkatkan keselamatan jalan raya untuk mengurangkan kemalangan** melalui mekanisme penguatkuasaan dan kempen kesedaran yang lebih berkesan; dan
- **Strategi D2: Menambah baik perkhidmatan kecemasan untuk menyelamatkan nyawa** melalui rondaan berkala, kerjasama dalam kalangan agensi, dan program pembangunan keupayaan untuk anggota perkhidmatan kecemasan yang pertama tiba di lokasi kemalangan, penyelamat, dan operator panggilan kecemasan.

### Strategi D1

## Meningkatkan keselamatan jalan raya untuk mengurangkan kemalangan

Kecuaian pemandu dikenal pasti sebagai punca utama kemalangan jalan raya, diikuti oleh keadaan jalan raya, dan tahap keselamatan kenderaan. Bilangan fataliti akibat kemalangan jalan raya yang direkodkan adalah tinggi dan meningkat daripada 6,877 pada tahun

2011 kepada 6,915 pada tahun 2013. Kerajaan menyasarkan untuk mengurangkan indeks fataliti kemalangan jalan raya daripada 2.9 pada tahun 2013 kepada 2.0 bagi setiap 10,000 kenderaan berdaftar menjelang tahun 2020. Matlamat ini akan dicapai melalui peluasan pelaksanaan Sistem Penguatkuasaan Automatik (AES) dan semakan semula Sistem Kesalahan Jalan Raya (KEJARA) bagi mengenakan hukuman yang lebih berat kepada pemandu yang ingkar. Sementara itu, kempen kesedaran jalan raya akan diperluas melalui media sosial.

### Strategi D2

## Menambah baik perkhidmatan kecemasan untuk menyelamatkan nyawa

Pelbagai agensi terlibat dalam penyediaan perkhidmatan kecemasan. Oleh itu, Kerajaan akan memperkukuh kerjasama dalam kalangan agensi bagi memastikan respons dan pengeralahan sumber ke tempat kejadian dengan lebih cepat dan cekap. Di samping itu, keupayaan anggota perkhidmatan kecemasan yang pertama tiba di lokasi kemalangan, penyelamat, dan operator panggilan kecemasan akan dipertingkatkan melalui latihan khusus dan latihan kecemasan yang kerap.





## Bidang fokus E

# Membudayakan semangat 1Malaysia untuk memperkukuh kesepaduan sosial dan perpaduan nasional

Konsep 1Malaysia berasaskan aspirasi untuk membangunkan masyarakat Malaysia yang harmoni, progresif, dan bersatu padu, berdasarkan prinsip “Rakyat Didahulukan, Pencapaian Diutamakan”. Konsep ini menekankan kepentingan persefahaman, hormat menghormati, dan menerima kepelbagaian yang wujud dalam masyarakat berbilang kaum. Di samping itu, konsep ini menekankan nilai perkongsian identiti kebangsaan, berasaskan kepada komitmen yang sama untuk membina negara maju dan makmur.

Pengukuhan integrasi adalah asas utama untuk memupuk kesepaduan sosial dan perpaduan nasional. Dalam RMKe-11, pengukuhan ini boleh dicapai melalui pengurangan polarisasi dan ketidaksamaan sosioekonomi merentasi wilayah dan kumpulan etnik. Kerajaan juga menyedari bahawa proses integrasi memerlukan pendedahan dan interaksi dalam kalangan masyarakat bagi meningkatkan persefahaman dan penghargaan terhadap kepelbagaian masyarakat Malaysia. Dalam tempoh RMKe-11, Kerajaan akan memberi tumpuan kepada usaha memperkukuh program dan platform untuk interaksi, penglibatan, dan kerjasama yang lebih besar dalam kalangan masyarakat yang pelbagai.

Selain kesepaduan sosial dan perpaduan negara, Kerajaan juga berazam untuk membina masyarakat yang bermoral dan beretika sepenuhnya selaras dengan aspirasi Wawasan 2020. Dalam tempoh RMKe-11, Kerajaan akan meningkatkan kerjasama dengan semua pihak berkepentingan, terutama institusi berasaskan masyarakat dan agama untuk memupuk rasa tanggungjawab bagi membina masyarakat yang beretika dan bermoral tinggi.

Gabungan matlamat masyarakat yang bersepadu, bersatu, dan beretika akan dapat dicapai melalui dua strategi:

- **Strategi E1: Menggalakkan integrasi sosial dan etika untuk memupuk masyarakat yang bersatu dan bermoral.** Strategi ini bukan sahaja akan melibatkan pewujudan perkongsian pengalaman tetapi juga memperkukuh kaedah penerapan etika dan moral ke dalam sistem pendidikan. Perkongsian pengalaman seperti aktiviti kesukarelawanan, kesenian, kebudayaan, dan warisan akan meningkatkan persefahaman dan menghargai kepelbagaian dalam kalangan rakyat Malaysia; dan
- **Strategi E2: Menggiatkan penglibatan pihak berkepentingan untuk membina rasa tanggungjawab bersama.** Strategi ini akan dicapai dengan membina kesedaran tentang peranan setiap pihak berkepentingan, iaitu kerajaan, sektor swasta, masyarakat, dan individu. Semua perlu memainkan peranan dalam membina masyarakat yang bertolak ansur dan penyayang.

## Strategi E1

### Menggalakkan integrasi sosial dan etika untuk memupuk masyarakat yang bersatu dan bermoral

RMKe-11 akan memperkembangkan program integrasi sosial dan perpaduan sedia ada untuk mengurangkan pertindihan dan meningkatkan keberkesanan. Kerajaan juga akan menambah bilangan program integrasi sosial dan perpaduan di institusi pendidikan dari sekolah hingga universiti. Sebagai contoh, sebanyak 5,000 pelajar dari IPT akan menyertai Program Kerjaya MySilang untuk meningkatkan penerimaan dan toleransi mereka terhadap rakyat Malaysia yang mempunyai pelbagai latar belakang melalui interaksi dan pendedahan bersama.

RT digalakkan untuk menganjur dan melaksana program bagi memperkukuh perpaduan dalam kawasan keijiranan masing-masing. Lebih 400 pasukan wanita pelbagai kaum akan diwujudkan melalui program J-Nita di bawah RT. Di samping itu, program seperti KOSPEN, pertanian bandar, dan Bomba Sukarela akan berfungsi sebagai platform untuk menggalakkan integrasi sosial.

Seni dan budaya akan dibangunkan untuk menggalakkan perkongsian budaya dan warisan Malaysia, serta menawarkan satu lagi platform untuk menerima kepelbagaian dan berkongsi identiti kebangsaan. Usaha untuk mempromosikan warisan budaya seperti mak yong dan wayang kulit akan disokong bagi membangunkan bakat individu dan masyarakat yang berminat. Penyelidikan dalam bidang seni dan budaya akan dipergiat bagi memastikan kesahihan dan kesinambungan warisan negara Malaysia. Akses kepada aktiviti kesenian dan kebudayaan juga akan dipertingkatkan dan digalakkan melalui penglibatan masyarakat yang lebih meluas.

Kebolehan dan keupayaan institusi penyelidikan dan latihan akan dipertingkatkan bagi menambah baik perancangan, pemantauan, dan pelaksanaan program perpaduan dan hubungan etnik. Institut Kajian Etnik dan Institut Kajian dan Latihan Integrasi Nasional akan diperkukuh.

Di bawah Pelan Pembangunan Pendidikan Malaysia 2013-2025, Kerajaan telah menetapkan bahawa etika dan kerohanian sebagai satu daripada enam keberhasilan pelajar yang dihasratkan. Kurikulum persekolahan formal, dari prasekolah hingga ke pengajian tinggi akan dipertingkatkan untuk mencapai keberhasilan yang ditetapkan. Lebih banyak kempen akan dilaksanakan oleh agensi berkaitan untuk menanam nilai pemikiran sivik dalam kalangan belia. Program tersebut juga akan disasarkan kepada belia berisiko.

## Strategi E2

### Menggiatkan penglibatan pihak berkepentingan untuk membina rasa tanggungjawab bersama

Usaha untuk memupuk persefahaman, toleransi, dan etika akan dilaksanakan melalui penglibatan masyarakat yang meluas. Sebagai contoh, di peringkat masyarakat, Kerajaan akan bekerjasama dengan NGO untuk menerap nilai etika dan moral melalui program dan kempen kesedaran bersasar yang khusus. Pemimpin masyarakat dan profesional disarankan untuk menjadi contoh dan teladan bagi tingkah laku yang terpuji dan penyayang. Institusi agama juga akan memainkan peranan yang lebih besar dalam memupuk nilai-nilai murni melalui pelaksanaan program masing-masing.

Selaras dengan peningkatan akses kepada maklumat, setiap rakyat Malaysia perlu mengambil inisiatif untuk mengamalkan penyebaran maklumat yang bertanggungjawab. Laporan yang bertanggungjawab dalam media arus perdana dan dalam talian juga adalah penting untuk memastikan liputan yang adil dan bukan bertujuan provokasi.



## Bidang fokus F

# Menggiatkan sukan untuk kehidupan yang sihat dan memupuk perpaduan

Sukan adalah satu komponen penting dalam menggalakkan gaya hidup aktif dan sihat. Penyertaan yang lebih ramai dalam sukan akan meningkatkan integrasi sosial dan perpaduan dalam kalangan masyarakat Malaysia. Sebanyak 50% daripada rakyat Malaysia disasarkan membudayakan sukan menjelang tahun 2020 dengan menjadikan aktiviti fizikal dan sukan sebagai sebahagian daripada kehidupan. Sasaran ini akan dicapai melalui strategi berikut:

- **Strategi F1: Menggalakkan penyertaan dalam sukan massa di semua peringkat masyarakat untuk membudayakan sukan.** Strategi ini akan dicapai melalui kerjasama yang lebih kukuh antara kerajaan, sektor swasta, NGO, dan masyarakat;
- **Strategi F2: Membangunkan kepimpinan belia dalam sukan.** Strategi ini akan dicapai melalui langkah seperti program pembangunan kebolehan untuk membina keupayaan dan profesionalisme persatuan dan NGO sukan; dan
- **Strategi F3: Membangunkan atlet berprestasi tinggi untuk mencapai reputasi global.** Strategi ini akan dilaksanakan melalui program latihan khusus, pematuhan standard antarabangsa yang lebih ketat, dan penganjuran acara sukan antarabangsa.

## Strategi F1

### Menggalakkan penyertaan sukan massa di semua peringkat masyarakat untuk membudayakan sukan

Kerajaan akan memberi tumpuan kepada strategi untuk menjadikan Malaysia sebuah Negara Sukan (*Sporting Nation*) dengan penyertaan masyarakat secara meluas dalam pelbagai aktiviti sukan, kecergasan, dan rekreasi. Program ikonik seperti FitMalaysia, Liga Sukan untuk Semua, Sukan untuk OKU, dan kejohanan futsal akan diperluas. Taman awam akan digunakan untuk aktiviti rekreasi dan sukan komuniti. Kerjasama antara kerajaan, sektor swasta, dan NGO dalam mempromosi dan melaksana program sukan serta penyediaan dan penyenggaraan kemudahan sukan akan diperkukuh.

## Strategi F2

### Membangunkan kepemimpinan belia dalam sukan

Kerajaan akan melaksana lebih banyak program peningkatan kemahiran untuk meningkatkan profesionalisme belia dan pemimpin sukan dan persatuan sukan. Program kepimpinan sukan yang komprehensif, terutamanya dalam pengurusan acara dan pengurusan sukan bersepadu, serta program kejurulatihan akan dipertingkatkan untuk membangunkan pemimpin berpotensi dalam sukan dan aktiviti berkaitan sukan.

## Strategi F3

### Membangunkan atlet berprestasi tinggi untuk mencapai reputasi global

Sebagai persiapan untuk Sukan Olimpik 2020, program pengenalpastian bakat atlet berpotensi akan dikendalikan di peringkat sekolah dan IPT. Program latihan yang komprehensif akan diwujudkan dan kemudahan sukan akan ditambah baik. Program pembangunan atlet berprestasi tinggi akan diselia oleh pasukan khusus terdiri daripada pakar pelbagai bidang. Di samping itu, keupayaan Agensi Anti-Doping Malaysia (ADAMAS) akan dipertingkatkan bagi memenuhi keperluan piawaian antarabangsa *World Anti-Doping Agency* dalam menguat kuasa penggunaan bahan terlarang sifar. ADAMAS juga akan menjalankan program kesedaran dan pendidikan mengenai *doping* dalam kalangan atlet di seluruh negara. Seterusnya, Malaysia akan menjadi tuan rumah bagi acara dan kejohanan sukan antarabangsa dalam menyediakan platform untuk menggilap bakat sukan Malaysia.

